

Ո Ր Ո Շ ՈՒ Մ թիվ-286
Վարչական տույժ նշանակելու մասին

«12» նոյեմբերի 2020թ.

ք. Երևան

ՀՀ պետական եկամուտների կոմիտեի իրավաբանական վարչության պետի ժամանակավոր պաշտոնակատար Ն.Ավանեսյանս, քննելով ԻԻՀ քաղաքացի Բահրամ Ակբարի Ղասեմինեժադի վերաբերյալ նյութերը.

Պ Ա Ր Զ Ե Ց Ի՝

2020 թվականի հոկտեմբերի 07-ին ՀՀ ՊԵԿ Հարավային մաքսատուն-վարչության աշխատակիցները Մեղրիի մաքսային կետ-բաժնի տարածքում զննության են ենթարկել ԻԻՀ-ից ՀՀ ժամանած, ԻԻՀ քաղաքացի Բահրամ Ակբարի Ղասեմինեժադի կողմից շահագործվող «SCANIA» մակնիշի, 69A501-10/69A502-10 հաշվառման համարանիշի բեռնատար ավտոմեքենան, ինչի արդյունքում նշված ավտոմեքենայի հենասարքին ամրացված թաքստոցներից հայտնաբերել է մաքսային հսկողությունից թաքցնելով, ՀՀ մաքսային սահմանով տեղափոխված ընդհանուր 110 կգ քաշով, թվով 19 տարաներում, մեքենայի շարժիչի հանքային յուղ:

Փաստի առթիվ Բահրամ Ղասեմինեժադի նկատմամբ ՀՀ մաքսային օրենսգրքի 201-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ հիշյալ ընդհանուր 110 կգ քաշով, թվով 19 տարաներում, մեքենայի շարժիչի հանքային յուղը վերցվել և ի պահ է հանձնվել Մեղրիի մաքսային կետ-բաժնում:

Բահրամ Ղասեմինեժադին 18.10.2020թ. ծանուցագրով 2020 թվականի նոյեմբերի 11-ին հրավիրվել է ՀՀ ՊԵԿ իրավաբանական վարչություն իր նկատմամբ սկսված վարչական գործի վարույթին մասնակցելու համար՝ միաժամանակ նախագգուշացվելով, որ ՀՀ մաքսային օրենսգրքի 219-րդ հոդվածի համաձայն՝ չներկայանալու դեպքում վարչական գործի վարույթը կիրականացվի առանց իր մասնակցության, սակայն վերջինս չի ներկայացել:

Վարչական վարույթի ընթացքում հարցում է կատարվել ՀՀ ՊԵԿ Հարավային մաքսատուն-վարչություն, որտեղից ստացված 19.10.2020թ. գրության համաձայն՝ ԻԻՀ քաղաքացի Բահրամ Ղասեմինեժադի կողմից շահագործվող «SCANIA» մակնիշի, 69A501-10/69A502-10 հաշվառման համարանիշի բեռնատար ավտոմեքենայում հայտնաբերված, Մեղրիի մաքսային կետ-բաժնում գտնվող ընդհանուր 110 կգ քաշով, թվով 19 տարաներում, մեքենայի շարժիչի հանքային յուղը «բացթողում ներքին սպառման համար» մաքսային ընթացակարգով 07.10.2020թ. հայտարարագրելու դեպքում մաքսային արժեքը կկազմեր 70181 ՀՀ դրամ, մաքսային վճարները կկազմեին ընդհանուր 83125 ՀՀ դրամ, որից մաքսատուրք՝ 1404 ՀՀ դրամ, ակցիզային հարկ՝ 55000 ՀՀ դրամ, ԱԱՀ՝ 25317 ՀՀ դրամ, բնապահպանական վճար՝ 1404 ՀՀ դրամ: Արգելքներ, սահմանափակումներ և ոչ սակագնային կարգավորման միջոցներ չեն կիրառվում:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում է համարվում ապրանքների տեղափոխումը Միության մաքսային սահմանով այն վայրերից դուրս,

որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով եւ (կամ) նույնականացման կեղծ կամ այլ ապրանքներին վերաբերող միջոցներ օգտագործելու միջոցով:

ՀՀ Մաքսային օրենսգրքի 189-րդ հոդվածի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

Բահրամ Ղասեմինեժադին 18.10.2020թ. ծանուցագրով 2020 թվականի նոյեմբերի 12-ին հրավիրվել է ՀՀ ՊԵԿ իրավաբանական վարչություն՝ իր նկատմամբ սկսված վարչական գործի քննությանը մասնակցելու համար, սակայն վերջինս չի ներկայացել: ՀՀ մաքսային օրենսգրքի 219-րդ հոդվածի համաձայն՝ գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Համաձայն ՀՀ ՊԵԿ ՆԱ վարչությունից ստացված ՍԷԿՏ համակարգում առկա տեղեկատվության Բահրամ Ղասեմինեժադին 02.11.2020թ.-ից գտնվել է ՀՀ-ից դուրս:

Այսպիսով, նյութերով պարզվել է, որ 2020 թվականի հոկտեմբերի 07-ին ԻԻՀ քաղաքացի Բահրամ Ղասեմինեժադին, մաքսային հսկողությունից թաքցնելով, ապրանքների հայտնաբերումը դժվարացնող եղանակով, ՀՀ մաքսային սահմանով տեղափոխել է 70181 ՀՀ դրամ մաքսային արժեքով ընդհանուր 110 կգ քաշով, թվով 19 տարաներում, մեքենայի շարժիչի հանքային յուղը, այսինքն՝ թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ և ՀՀ ՊԵԿ Հարավային մաքսատուն-վարչության 19.10.2020թ. գրությամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 201-րդ հոդվածով, 206 և 221 հոդվածներով,

Ո Ր Ո Շ Ե Ց Ի՝

1. Բահրամ Ակբարի Ղասեմինեժադին (ծնված՝ 04.01.1990թ., ԻԻՀ քաղաքացի, քնակվող՝ ԻԻՀ, ք. Խոյ, Հեյդարի փող., 3-րդ տուն, անձնագրի համարը՝ E52812703) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել թաքցնելով ՀՀ մաքսային սահմանով տեղափոխված ընդհանուր՝ 110 կգ քաշով, թվով 19 տարաներում, մեքենայի շարժիչի հանքային յուղի մաքսային արժեքի չափով՝ 70181 ՀՀ դրամ: /900005024055 (կող-19) հաշվեհամարին/

2. Վերցված ապրանքները կարող են վերադարձվել մաքսային ձևակերպումները կատարելուց, տուգանքի վճարումից, մաքսային վճարների և պարտավորությունների կատարումից հետո՝ մեկ աշխատանքային օրվա ընթացքում:

3. ԵԱՏՄ Մաքսային օրենսգրքի 98-րդ հոդվածի 4-րդ մասի համաձայն որոշումն ուժի մեջ մտնելու օրվան հաջորդող օրվանից ոչ ուշ, քան 10 օրացուցային օրվա ընթացքում վերցված ապրանքները պետք է հանձնվեն ժամանակավոր պահպանման:

4. Որոշման մասին հայտնել Բ. Ղասեմինեժադին՝ պարզաբանելով, որ այն կայացնելուց հետո 10 օրվա ընթացքում կարող է բողոքարկել վերադաս մաքսային մարմին (ՀՀ ՄՕ 222-րդ հոդվածի 2-րդ մաս) կամ ՀՀ Վարչական դատարան երկու ամսվա ընթացքում (ՀՀ Վարչական դատավարության օրենսգրքի 72-րդ հոդվածի 1-ին մասին 1-ին կետ):

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏԻ
ԺԱՄԱՆԱԿԱՎՈՐ ՊԱՇՏՈՆԱԿԱՆԱՐ



Ն. ԱՎԱՆԵՍՅԱՆ